

Stad egl unviern a Sumvitg

■ (anr/sb) El kiosc da cultura alla staziun da Sumvitg-Cumpadials dat ei puspei ina nova exposiziun. L'installaziun da Liz Oppenheimer e Guido Loeckx porta il tetel «stad egl unviern a Sumvitg» ed ei aunc da veser tochen ils 21 da mars 2009. Liz Oppenheimer che habitescha a Turitg ei in'artista visuala e sescolada sco sculputura. Sco Hannes Schüle, il curatur dil spurtegl d'art a Sumvitg, ha informau l'Agentura da novitads romontscha fettschi ella adina puspei surstar la scena d'art internaziunala cun sias installaziuns inspirontas ed originalas. Inspira da dil macrocosmos e dalla natira microscopica metta ella en damonda cri-

ticamein las manipulaziuns dils humans. Exempels ein praus da narcissas che creschan ord boxas da tresors ni parts d'ina flur suleagl fixadas sut plattas d'in microscop. Sias exposiziuns possien semegliar in labor da biologia e curiositads vegnien exponidas sco collecziuns d'insects. En l'invitaziun per l'exposiziun alla staziun ha Hannes Schüle scret ch'ils dus artists portien ina perspectiva da stad ella cuntrada d'unviern da Sumvitg. Aschia dueigi il spurtegl d'art purtar in radi suleagl ni schizun esser in'oasa inspironta ella cuntrada enzugliada cun ina cozza alva da neiv. Dapli ha el buca vuliu tradir, aschia ch'ei ha giu num ir e mirar tgei

che l'artista Liz Oppenheimer e siu partenari Guido Loeckx capeschan sut «stad egl unviern». Lur exposiziun para sempla e sch'ins astga dir quei aschia – bu namein banala.

Denton drov'ei pilver dabia fantasia da purtar aschia la stad egl unviern e forsa ei quei gia art? Ella staziun pendan caussas sco rings da senudar, bals d'aria, animals d'aria per termagliar e monginas. Al spurtegl san ils visitaders smaccar in nuv per udir treis minutas ramurs da stad. Mo forsa meis sezs a mirar? Per in surrir ni ina risada tonsch'ei franc e lu han ils artists magari contonschiu lur finamira e purtau in tec glisch e cauld el freid unviern.



Liz Oppenheimer e Guido Loeckx han installau la «stad egl unviern a Sumvitg» el kiosc da cultura alla staziun.

FOTO S. BEARTH